



President vun der Chamber

Lëtzebuerg, den 21. November 2024

Här President,

Esou wéi d'Chambersreglement et virgesäit, biede mir lech, dës parlamentaresch Fro iwwert **d'Qualitéitssécherung an der non-formaler Bildung** un den **Här Minister fir Educatioun, Kanner a Jugend** weiderzeleeden.

De Staat huet am September 2016 en Dispositif agefouert, deen d'pedagogesch Qualitéit am Beräich vun der non-formaler Bildung garantéiere soll an dee fir all Bildungs- a Betreuungsstrukturen, Minicrèchen an Dageseltere gëllt, déi Prestatairë vum Chèque-service-accueil-System (CSA) sinn.

An dësem Kontext gëtt et zanter Ufank 2022 gratis Formatiounen fir d'Erzéiungspersonal an d'Dageselerten esou wéi d'Direktiounsekippen an den Ariichtungen. De Suivi vun der pedagogescher Qualitéit gëtt um Terrain vun den Agent.e.s régionaux.ales sécher gestallt.

An dësem Kontext erlabe mir eis folgend Froen ze stellen :

1. **Ass et richteg dass et am MENJE um Niveau vun der zoustänneger Administratioun zu Ëmstrukturéierung kumm ass, wat d'Qualitéitssécherung ugeet? Wa jo - wéi eng wieren dat?**
2. **A wéi wäit gëtt de säit e puer Joer funktionéierenden Dispositif vun der Weiterbildung an der non-formaler Bildung elo mat deem vun der Aide à l'enfance harmoniséiert?**
3. **Wéi ass d'Auslaaschtung vun de Formatiounsagencen? Wéi vill Formatiounen ginn all Joer an Usproch geholl a wéi ass de Finanzéierungsschlëssel vun dëser Offer?**
4. **Ass den Här Minister zefridde mam opgebaute System vu Formatiounen a gëtt dee regelméisseg – zesumme mat den Agencen sou wéi der FEDAS an der ELSEA evaluéiert?**
5. **Hält den Här Minister gär dru fest, dass déi sougenannten "Sur-Mesure Stonnen" an der Formation continue op maximal 24 Stonne pro Tranche vun 12 Mataarbechter.inne limitéiert bleiwen?**
6. **A wéi wäit denkt den Här Minister driwwer no, fir d'Konzept vun den Agent.e.s régionaux.ales weider ze entwéckelen?**
7. **Wéi eng Méiglechkeeten envisagéiert de Minister fi d'Vernetzung tëscht den Agent.e.s régionaux.ales, der Formatiounsoffer an aneren Qualitéitsentwécklungsméiglechkeeten ze förderen?**

Mat déiwem Respekt,

Djuna BERNARD

Deputéiert



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 1576 vun der honorabeler Deputéiert Djuna Bernard**

Ad 1)

Et ass richtig, datt et innerhalb vum Ministère fir Educatioun, Kanner a Jugend (MENJE) zu enger Restrukturierung komm ass. D'Entwécklung vun der Qualitéit an de Strukture vun der non-formaler Bildung an an der Aide à l'enfance et à la famille ass eng vun de Prioritéiten, déi am Regierungsaccord festgehal gouf.

An deem Kontext gouf en neie Service ministériel kreéiert, dee genau dat als Optrag huet: d'Strukturen an der Qualitéitsentwécklung ze ënnerstëtzen.

Ad 2)

Den Dispositif de développement professionnel fir de Secteur vun der non-formaler Bildung, esou wéi een en haut kennt, ass zanter Ufank 2022 operationell. Am éischten Trimester 2023 goufen zousätzlech Formatioune fir de Secteur vun der Aide à l'enfance et à la famille integréiert. Dëst geet wäit iwwer d'Ufuerderung vun enger Harmonisatioun eraus, well et och eng stänneg Erweiderung vun der Formatiounsoffer mat sech bréngt.

Am Aklang mam *Règlement grand-ducal du 27 juin 2016 concernant l'assurance de la qualité dans l'activité de l'assistance parentale, dans les services d'éducation et d'accueil pour enfants et dans les services pour jeunes*, gëtt bei der Entwécklung vun neie Formatiounen de Besoin vun de Professionellen aus béide Secteure berücksichtegt. D'Haaptzil bleift d'Sécherung vu qualitativ héichwäertegen Déngschtleeschungen an alle pädagogeschen a soziale Kontexter.

Ad 3)

Am Joer 2023 hunn d'Agencen net all budgetéiert Stonne genotzt; déi effektiv geleschte Stonne louchen ënnert deenen, déi den Agencë vum MENJE zur Verfügung gestallt goufen. Fir d'Joer 2024 goufen op Basis vun den Ufroe vun de Strukture zousätzlech Stonnen den Agencen zur Verfügung gestallt. De Bilan vun de geleschte Stonnen am Joer 2024 gëtt am Joer 2025 op Basis vun de järeliche Berichter vun den Agencen erstallt.

De Budget fir d'Formation continue gëtt a verschidde Käschtepunkten agedeelt; dorënner falen d'Formatiouns- a Personalkäschten esouwéi d'Frais de fonctionnement vun den Agencen.

Ad 4)

Den aktuelle System vu Formatiounen, deen den evolutiven Ufuerderunge vun de Professionellen an de Secteure vun der non-formaler Bildung an der Aide à l'enfance et à la famille gerecht gëtt, ass zefriddestellend. Dësen Dispositif dréit zur Verbesserung vun der Qualitéit vun der Betreierung vum cibléierte Public bäi, andeems en eng breet Pallett vu Formatiounen, Coaching a Supervisioun ubitt.

Et ass awer wichteg, reegelméisseg d'Offer vum Dispositif, d'Demanden an d'Besoine vum Terrain esouwéi de Finanzement ze evaluéieren an unzepassen. Am Kader vun engem strukturéierten Dialog mat den zoustännege Partner gëtt den Dispositif och reegelméisseg an der Commission de la formation continue evaluéiert.

An de verschiddeenen Austauschplattformen ass een am Echange ënnert anerem mat den Agencen, déi d'Formatiounen ubidden (wéi *Arcus*, *Elisabeth*, *Croix-Rouge*, *Caritas Jeunes et Familles* oder *Interactions*), mat der FEDAS, der FELSEA an anere relevanten Acteuren. Dëst ass onëmgänglech, fir eng kontinuéierlech Upassung vum Dispositif un d'Besoine vum Terrain an un d'politesch Fuerderungen ze garantéieren.

Ad 5)

Am Joer 2024 goufen nei Modalitéite fir déi sougenannte „Crédits d'heures“ oder „Sur-mesure-Stonnen“ agefouert. Dës Moosname garantéieren de Strukturen en onbegrenzten Zougang zu de Formatiounen, déi am Katalog ugebuede ginn, während hinne spezifesch Kreditter zougedeelt ginn, fir op d'Mooss ugepasste Formatiounen ze organiséieren, wéi och Coaching- a Supervisiounssätzungen, déi op hir Besoinen ofgestëmmt sinn.

Eng Evaluatioun gëtt am Joer 2025 duerchgefouert, fir e Bilan ze zéien an eventuell noutwendeg Upassungen ze identifizéieren.

Ad 6)

Esou wéi am Regierungsprogramm 2023-2028 festgehalen, ass et virgesinn, d'Roll vum Agent régional weider auszubauen. Opbauend op d'Erfarungen, déi an de leschte fënnef Joer gesammelt goufen, wäerte verschiddeenen Elementer vun der Roll vum Agent régional ugepasst ginn.

Ad 7)

Och an Zukunft schaaft den Agent régional eng Verbindung tëscht der Formatiounsoffer an anere Qualitéitsentwécklungsméiglechkeeten, andeems de Secteur jee no Thematik a Prioritéit op déi passend Offeren an Entwécklungsméiglechkeeten higewisen gëtt.

Zousätzlech steet den Agent régional am enke Kontakt mat der Divisioun Formation continue, fir d'Besoinen aus dem Secteur opzegräifen a weiderzeleeden, sou datt d'Offer un d'Ufuerderungen ugepasst ka ginn.

Lëtzebuerg, de 17. Januar 2025

De Minister fir Educatioun,
Kanner a Jugend

(s.) Claude MEISCH